

Staðfesting samvistar

form lagt fyrir Prestastefnu 2008 af Biskupafundi



Staðfesting samvistar samkvæmt lögum um breytingu á lögum um staðfesta samvist, nr. 87/1996, er athöfn sem efiir því sem við á hverju sinni, getur farið fram í kirkju eða kapellu, eða á heimili.

Safnast er saman í kirkjunni. Leika má forspil á orgelið eða flytja aðra tónlist. Parið tekur sér sæti í kór ásamt svaramönnum. Prestur fer fyrir altarið.

Upphaf

P Í nafni Guðs, föður og sonar og heilags anda.

A Amen.

P Hjálp vor kemur frá Drottni.

A Skapara himins og jarðar.

Ávarp

Prestur getur flutt hugleiðingu á undan eftirfarandi ávarpi.

Við erum hér saman komin í dag vegna þess að þið, NN og NN, hafið valið *hvor annan / hvor aðra* að lífsförunaut viljið staðfesta samvist ykkar.

Kærleikurinn sem vaxið hefur milli ykkar fyllir ykkur gleði og von og við tökum þátt í gleði ykkar. Þið eruð hér til að biðja Guð að blessa þann ásetning ykkar að deila kjörum og búa saman í tryggð og trúfesti, ástúð og eindrægni.

Fyrir augliti Guðs og manna viljið þið staðfesta þann ásetning ykkar að elska og heiðra *hvor annan / hvor aðra* í sameiginlegri framtíð. Þið viljið gera öllum kunnugt að þið takið sameiginlega ábyrgð á því sem ykkur er trúað fyrir og því sem lífið færir ykkur að höndum.

(Sálmur)

Bæn

P Algóði Guð. Við þökkum þér fyrir lífið sem þú gefur okkur. Við þökkum þér fyrir þau öll sem hafa umvafið okkur með kærleika sínum frá því við vorum börn og allt til þessa dags. Við biðjum þig, gef okkur það sem við þörfumst mest, endurnýja umhyggju okkar og kærleika dag hvern. Þess biðjum við í Jesú nafni. Amen.

Ritningarlestrar (*lesa má einn eða fleiri lestra*)

1. Kor. 13, Ljóðaljóðin 8:6-7, Sálm 100, Sálm 108.1-5,
Róm.12. 9-13, Gal. 3.27-28, Fil 2.1-4, 1. Jóh. 3.18-24, 1. Jóh.4.7-21,
Matt. 5.1-16, Lúk. 6.32-38

Sálmur (eða önnur tónlist)

Spurningar og handsal (tvær tillögur)

Tillaga A

Parið gengur að altarisgráðum og stendur þar. Svaramenn standa til beggja handa.

P Nú spyr ég þig NN hvort þú viljir stofna til samvistar við NN sem hjá þér stendur

Svar: Já

Vilt þú með Guðs hjálp reynast *honum/ henni* trúr, elska *hann/ hana* og virða í hverjum þeim kjörum sem Guð lætur ykkur að höndum bera?

Svar: Já

Sömuleiðis spyr ég þig NN hvort þú viljir stofna til samvistar við NN sem hjá þér stendur

Vilt þú með Guðs hjálp reynast *honum/ henni* trúr, elska *hann/ hana* og virða í hverjum þeim kjörum sem Guð lætur ykkur að höndum bera?

Svar: Já

Sé skipst á hringum við athöfnina, má presturinn rétta parinu hringina með þessum orðum:

Dragið hring á hönd *hvor öðrum / hvor annarar* til vitnisburðar um band ástar og trúfesti.

Því næst mælir presturinn:

Gefið nú *hvor öðrum / hvor annarri* hægri hönd ykkar þessum sáttmála til staðfestu.

Prestur leggur hægri hönd yfir hendur parsins og segir:

P Þar sem þið hafið nú lýst vilja ykkar til að lifa saman í staðfestri samvist og játað þetta opinberlega fyrir augliti Guðs og í áheyrn þessara votta (þessa safnaðar) og gefið *hvor öðrum / hvor annarri* hönd ykkar þessu til staðfestu lýsi ég yfir því að samvist ykkar er staðfest.

P Guð, sem er kærleikur varðveiti ykkur í krafti sínum og blessi ykkur með náð sinni og geri ykkur að bústað friðarins fyrir *hvor annan / hvor aðra* og fyrir okkur öll.

Tillaga B

P Nú spyr ég þig NN hvort þú viljir stofna til samvistar við NN sem hjá þér stendur?

Svar: Já

Sömuleiðis spyr ég þig NN hvort þú viljir stofna til samvistar við NN sem hjá þér stendur?

Svar: Já

P Takist í hendur og lýsið yfir ásetningi ykkar um tryggð og trúfesti með því að hafa yfir eftirfarandi orð:

NN segir: N ég nefni nafnið þitt í kærleika og gleði, frammi fyrir augliti Guðs og þessa safnaðar. Þú hefur heitið því að deila þínu lífi með mínu um alla framtíð. Ég heiti þér tryggð og trúfesti. Ég vil standa með þér alla daga erfiða sem auðvelda, og vil leitast við að ganga með þér á vegum Guðs. Ég bið að Guð leiði okkur í Jesú nafni.

NN endurtekur

Sé skipst á hringum við athöfnina, má presturinn rétta parinu hringina með þessum orðum:

Dragið hring á hönd *hvor öðrum/ hvor annarar* til vitnisburðar um band ástar og trúfesti.

Því næst mælir presturinn:

Gefið nú *hvor öðrum / hvor annarri* hægri hönd ykkar þessum sáttmála til staðfestu.

Prestur leggur hægri hönd yfir hendur parsins og segir:

P Þar sem þið hafið nú lýst vilja ykkar til að lifa saman í staðfestri samvist og játað þetta opinberlega fyrir augliti Guðs og í áheyrn þessara votta (þessa safnaðar) og gefið *hvor öðrum / hvor annarri hönd* ykkar þessu til staðfestu, lýsi ég yfir því að samvist ykkar er staðfest.

P Guð, sem er kærleikur varðveiti ykkur í krafti sínum og blessi ykkur með náð sinni og geri ykkur að bústað friðarins fyrir *hvor annan / hvor aðra* og fyrir okkur öll.

Bæn

Parið krýpur á gráðurnar

P Vér biðjum þig Guð fyrir N og N. Varðveit *þá/þær* í kærleika þínum og lát skilning þeirra og trúfesti vaxa á veginum sem *þeir/þær* ganga saman. Varðveit með þeim gleði þeirra, gæsku og umhyggju gagnvart þeim sem tilheyra lífi þeirra. Fylg þeim með blessun þinni alla daga sem þú gefur þeim að lifa. Vér biðjum fyrir öllum fjölskyldum og heimilum. Hjálpa oss til að taka hvert annað að oss eins og Kristur hefur tekið oss að sér. Amen

Faðir vor og blessun – með handayfirlagningu

P Biðjum saman bæn Drottins.

A Faðir vor...

P Takið blessun Drottins.

Drottinn blessi þig....

A Amen

Útganga